

佛說大魚事經

卷八

十四

東晉西域沙門竺曇無蘭譯

聞如是一時婆伽婆在舍衛城祇樹給孤獨園爾時世尊告諸比丘往昔時有一水饒諸大魚爾時大魚勅小魚曰汝等莫離此間往他處所備爲惡人所得爾時小魚不從大魚教便往至他處所爾時魚師以飯網羅線捕諸魚諸小魚見便趣大魚處所爾時大魚見小魚來便問小魚曰汝等莫離此間往至他所爾時小魚便答大魚曰我等向者已至他所來大魚便勅小魚曰汝等至他所不爲羅網取捕耶小魚答大魚曰我等至彼不爲人所捕然遙見長線尋我後大魚語小魚曰汝等已爲所害所以然者汝所遙見線尋後來者昔先祖母盡爲此線所害汝今必爲所

害汝非我兒爾時小魚盡爲魚師所捕舉著岸上如是小魚大有死者此亦如是或有一比丘在他聚落遊行著衣持鉢同行乞食福度衆生不守護身不守護口意不具足諸根意不專一即於彼村落乞食時見諸女人端正無雙色猶桃華見已便起婬心卷八以此婬心身口意熾然彼以身口意熾然即於村落乞食還所止處故發欲想便往尊比丘所以此因緣具向諸比丘說諸尊大比丘告此比丘言汝起婬想此不爲淨汝比丘當惡露觀尊大比丘語復至再三爾時彼比丘身口意熾盛復至彼村落乞食遙見女人端正無比色猶桃華見已便起婬心以此婬心身口意熾然彼以身口意熾然故即於彼村落乞食已還所止處往尊大比丘所以此因緣具向諸

比丘說彼尊比丘告此比丘言汝徃非我衆
中比丘爾時此比丘不捨禁戒便著俗服樂
愛欲中是謂比丘魔得其便隨波旬所欲亦
不脫生老病死愁憂苦惱如是諸比丘利養
具甚爲難甚爲苦甚爲恐懼墮入惡趣不生
無上處是故諸比丘當作是學已得利養當
捨離之未得利養不起貪意如是諸比丘當
作是學爾時諸比丘聞佛所說歡喜奉行

佛說大魚事經